



REPUBLIKA E KOSOVËS - REPUBLIKA KOSOVA - REPUBLIC OF KOSOVO  
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL

PANELI ZGJEDHOR PËR ANKESA DHE PARASHTRESA  
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

Anr.25/2025

**PANELI ZGJEDHOR PËR ANKESA DHE PARASHTRESA (PZAP)**, në panelin e përbërë nga gjyqtarët: Kymete Kicaj, kryesuese, Kujtim Pasuli dhe Bujar Muzaqi anëtarë, duke vendosur përkritazi me ankesën e parashtruar nga subjekti politik Lidhja Demokratike e Kosovës LDK, më seli në Prishtinë, paraqitur kundër vendimit të Komisionit Qendror të Zgjedhjeve (KQZ), Vendimi NR.01/33-2025, për shkak të refuzimit për ndarjen e mjeteve nga fondi për mbështetjen e subjekteve politike për periudhën nga Janari 2025 deri me 28 Shkurt 2025 për Financimin e Subjekteve Politike për Zgjedhjet e Përgjithshme për Kuvendin e Republikës së Kosovës, që do të mbahen më datë 09.02.2025, në seancën e panelit të mbajtur më datë 13.01.2025, mori këtë:

## V E N D I M

**Hedhet poshtë e palejuar** ankesa Anr.25/2025 e datës 10.01.2025, parashtruar nga Subjekti Politik Lidhja Demokratike e Kosovës LDK, më seli në Prishtinë, kundër vendimit të Komisionit Qendror të Zgjedhjeve (KQZ), NR.01/33-2025, të datës 08.01.2025 për shkak të refuzimit për ndarjen e mjeteve nga fondi për mbështetjen e subjekteve politike për periudhën nga Janari 2025 deri me 28 Shkurt 2025 për Financimin e Subjekteve Politike për Zgjedhjet e Përgjithshme për Kuvendin e Republikës së Kosovës, që do të mbahen më datë 09.02.2025.

## A r s y e t i m

Me datën 10.01.2025 subjekti politik Lidhja Demokratike e Kosovës ka paraqitur ankesë në PZAP, me të cilin kundërshton Vendimin e KQZ-së, për refuzimin e rekomandimit të Zyrës për Regjistrimin, Certifikimin dhe Kontrollin Financiar të Subjekteve Politike mbi caktimin e lartësisë së mjeteve nga Fondi për Mbështetjen e Subjekteve Politike për periudhën 1 janar 2025 deri me 28 Shkurt 2025.

Parashtruesi i ankesës thekson se bazuar në Ligjin për Financimin e Subjekteve Politike, respektivisht aktin nënligjor Rregulloren Nr. 03/2024 Menaxhimi dhe Mbikëqyrja Financiare e Subjekteve Politike, paragrafin 3 dhe 4 të nenit 4 të kësaj Rregullore shprehimisht thuhet se

"Zyra i rekomandon KQZ, ndarjen e mjeteve financiare nga fondi, për subjektet politike të përfaqësuar në Kuvendin e Republikës së Kosovës. Për çdo vit, nga data pesë (5) janar deri me datën pesëmbëdhjetë (15) janar, KQZ merr vendim për ndarjen e mjeteve nga fondi". Andaj, marrë parasysh këto rregulla ligjore, pastaj specifikisht sipas rekomandimit të Zyrës për Regjistrimin, Certifikimin dhe Kontrollin Financiar të Subjekteve Politike në KQZ drejtuar KQZ së, Lidhjes Demokratike të Kosovës i janë ndarë 91,525.42 Euro, mjete të cilat duhet ekzekutuar në xhirollogarinë e subjektit politik.

Me tutje në ankesë theksohet se vendimi për refuzim nga KQZ është i pabazë, ligjërishit i paqëndrueshëm dhe juridikisht i pa argumentueshëm, ngase një veprim i tillë është në kundërshtim me kërkesat bazike ligjore, marrë parasysh edhe faktin që jemi në afatin e zgjedhjeve të rregullta për Kuvend, dhe se praktikisht i bie që nga 9 janari pezullohet puna e Kuvendit dhe se këto mjete nuk mund të ekzekutohen minimalisht deri në fund të muajit mars apo më vonë, çka nuk do të kishte fare kuptim, as logjik, as juridik, as ligjor, madje e as të kontrollit korrekt financiar, sepse këto mjete i takojnë me ligj secilit subjekt dhe se të njëjtat në mungesë votash të përfaqësimit politik në KQZ nuk duhet të kthehen në objekt kontestimi, ngase në aspektin procedural krejt formalitet është kjo ndarje mjetesh, sepse ex-lege (sipas ligjit) parashihet një situatë e tillë.

Mbi bazën e të cekurave më lartë, LDK propozon që ankesa e saj të shpallet si e bazuar dhe se rekomandimi i Zyrës për Regjistrimin, Certifikimin dhe Kontrollin Financiar të Subjekteve Politike në KQZ të aprovohet sipas shumave të parapara që u takojnë subjekteve politike, ne rastin konkret edhe subjektit ankimues.

PZAP, me datë 10.01.2025 iu është drejtuar me kërkesë për përgjigje KQZ-së, lidhur me ankesën A.nr 25/02025 të parashtruar nga ankuesi Lidhja Demokratike e Kosovës, LDK. KQZ me datë 10.01.2025, ka parashtruar në PZAP, përgjigje në ankesë në të cilën theksohet se: Sipas paragrafëve 3 dhe 4 të nenit 3 të Rregullores Nr.03/2024 për menaxhimin dhe mbikëqyrjen financiare të subjekteve politike, ZRKSFSF në mbledhjen e KQZ me Nr.02/2025 të datës 08.01.2025 ka rekomanduar që 14 subjekteve politike të përfaqësuar në Kuvendin e Republikës së Kosovës të ju ndahen mjete financiare nga Fondi për Mbështetjen e Subjekteve Politike.

Në përgjigje po ashtu theksohet se rekomandimi i ZRCKFSF ka përmbajtur shpjegimin e shkruar për secilin subjekt politik si :” *Konform paragrafit 2 të nenit 7 të Ligjit për Financimin e Subjekteve Politike, Fondi për mbështetjen e subjekteve politike funksion në kuadër të KQZ-së, dhe rrjedhimisht pas pranimit të rekomandimit nga Zyra, KQZ me vendim, miraton ose refuzon rekomandimin e Zyrës*”.

KQZ pas diskutimeve lidhur me rekomandimin dhe votimin e të njëjtit nuk ka marr votat e mjaftueshme për miratimin e rekomandimit.

Paneli, pas shqyrtimit të ankesës së parashtruar nga ankuesi, vëren se e njëjta është e pa lejuar.

Për të vlerësuar lejueshmërinë e paraqitjes së ankesës, paneli iu referuar Ligjit Nr.08/L-228 për Zgjedhjet e Përgjithshme në Republikën e Kosovës, përkatësisht, nenit 119 paragrafi 3, me të cilin është përcaktuar se “PZAP-i vendos për të gjitha ankesat ndaj vendimeve të KQZ-së, të përcaktuara shprehimisht me këtë ligj.” Ndërsa kundër të cilave vendime të KQZ-së mund të ushtrohet ankesë është specifikuar me nenet, 27.6, 39.3, 41.5, 46, 51.4, 54.8, 69.7, 77.5, 80.3, 94.2, 98.3, 100.3, 102.1, 103.4 dhe 105.1, si dhe ato të cilat janë të përcaktuara në nenin 9, të Rregullores Nr.01/2024 për Procedurën e Shqyrtimit dhe Vendosijes së Ankesave.

Sipas vlerësimit të Panelit, nga interpretimi i dispozitave të Ligjit Nr.08/L-228 për Zgjedhjet e Përgjithshme në Republikën e Kosovës, nuk përcaktohet me asnjë dispozite ligjore se mund të ankimohen vendimet e kësaj natyre të KQZ-së, përkatësisht, vendimi i KQZ-së për ndarjen e mjeteve nga fondi për mbështetjen e subjekteve politike, në këtë kuptim, paneli vlerëson se rasti lëndor nuk hynë në kategorinë e vendimeve të KQZ-së të cilat mund të ankimohen në PZAP, e rrjedhimisht nga kjo edhe ankesa është e palejueshme.

Prandaj, nga arsyet e paraqitura si më lart, në pajtim me nenin 13 paragrafi 3 të Rregullores së PZAP-it Nr.01/2024 për Procedurën e Shqyrtimit dhe Vendosijes së Ankesave, si dhe nenit 119 paragrafi 3 të Ligjit për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi, duke e hedhur poshtë ankesën si të pa lejueshme.

### **Paneli Zgjedhor për Ankesa dhe Parashtresa**

**A.nr.25/2025, datë 13.01.2025**

**Kryesuese e Panelit**

**Kymete Kicaj**



**Këshilla Juridike:** Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.